

四庫全書

子部

欽定四庫全書

山堂肆考卷二百二十六

明 彭大翼 撰

昆蟲

蜂

格物論蜜蜂三種皆一日兩衙一種在林木上作房  
一種在人家作房其蜂甚小微黃蜜皆濃美一種黑  
色似蠶作房巖崖高峻之處其蜜名石蜜又名崖蜜  
其他有大黃蜂比蜜蜂差大在入屋及大木間作房

大如巨鍾以煙火逼散蜂母然後取之一房得蜂子或五六斗或至一石以鹽酪炒之曝乾味佳又土蜂子乃穴居者最大一名螽土人亦啖其子皆蠆尾能螫人又一種名蜾蜂巢在寨鼻蛇穴下故毒螫倍于諸蜂揚雄方言其大而有蜜謂之壺蜂即今黑蜂楚詞所謂赤蟻若象玄蜂若壺者也

食苗

洪範五行傳秦昭王三十八年上郡大饑蜂食田苗

獻蘭

近峰聞畧蜂採百花俱置翅間及股間惟蘭花則拱首  
入房以獻于王物亦知蘭之貴如此

退黃

鶴林玉露蜂交則黃退蝶交則粉退

釀蜜

埤雅採取百芳釀蜜其房如脾故謂之蜜脾舊說蜂之  
化蜜必取匿緒之水注之蠟房而後蜜成故謂之蠟者

蜜之蹠也

旋繞如衛

埤雅蜂有兩衙應潮其王之所在衆蜂旋繞如衛誅罰懲令絕嚴有君臣之義應潮者言一日兩衙皆應潮也故山谷詩黃蜂衙退早潮上

疊積如臺

埤雅王之所居疊積如臺語曰蜂臺蟻樓

投牕

見僧

綴屋

埤雅黃蜂無蜜纖長其窠仰綴于屋銜漆以固其蒂陰陽在尾喜合末端有岐者牝銳者牡也

蓄毒

詩周頌莫予荇蜂自求辛螫言蜂善辛螫藏精蓄毒雖小不可不慎注云荇使也

垂芒

化書蜂毒在尾垂穎如鋒故謂之蜂孝經援神契蜂蠆垂芒

化桑蟲

詩小雅螟蛉有子蜾蠃負之注云螟蛉桑上小青蟲也似步屈螺蠃土蜂似蜂而小腰取桑蟲負之于木空中七日而化為已子埤雅蜾蠃即今細腰蜂也一名蒲盧一名蠃蝓好禁蜘蛛撻泥作房如併竹管事文類聚蜾蠃所負不但螟蛉或取螻蛄礫而斃之因產一小卵于

其上俟其卵化而成形漸食所負之蟲久乃寢大生翼飛去其聲似云類我類我

食蜘蛛

陳藏器曰諸飛蟲着蜘蛛之網皆不能脫惟蜂不畏蜘蛛反擒而食之

尹母繫衣

見繼母

僧網置籠

龍門寺有異蜂大如鵲僧網置籠中明日又一大蜂至  
置籠前呼孔昇兄僧異而放之

附賈萌車

見車

集袁謙船

王隱晉書太尉陶侃表倉曹參軍袁謙為高涼太守未  
至百餘里浦中有蜜蜂蔽日而下集于謙船上會得留  
邵文書云賊欲乘虛攻郡謙欲速赴明日進西南卒遇

大風飛沙天地晦合不復得還浦遂沒海中

尋伴

博物志遠方諸山蜜蠟處以木為罌開一小孔以蜜蠟塗罌內外令遍春月蜂將生育時捕取得三兩頭着罌中蜂必飛去尋將伴來經日漸益遂停罌中

擁王

宋王元之蜂記商於兔和寺多蜂予問寺僧蜂之有王其狀若何曰其色青蒼差大于常蜂問何以服其衆曰

王無毒問王之所處曰窠之始營必造一臺其大如果俗謂之王臺王居其上且生子其中王之子盡復為王歲分其族而去山毗患蜂之分以棘刺關於王臺則王之子盡死而蜂不析矣又蜂之分也或團如罌或鋪如扇擁王而去王之所在蜂不敢螫失其王則潰亂而不可嚮邇

噬賊

宣驗記元嘉元年建安郡山賊百餘人掩破郡治噪掠

百姓遂入佛圖搜劫財寶忽有蜜蜂數萬從衣簾出同時噬螫群賊身皆腫痛眼俱盲合諸所掠者皆棄而走  
趣人

杜詩花外山蜂遠趣人

趨衙

山谷詩稚蜂趨衙供蜜課按蜜蜂朝夕排衙必羣聚喧鬧朝衙畢方出採花供課晚衙畢則入房每歲三四月則生黑色蜂名曰將蜂又名相蜂蜂王乃相蜂所生也

相蜂不能採花但能釀蜜蓋無此蜂則不能成蜜至七八月間相蜂盡死相蜂如不死則羣蜂告饑矣俗云相蜂過冬蜂房必空

遜位

蜂王大如小指不螫人如有二王則分處矣分蜂之時多老王遜位而出所分之蜂均挈其半未嘗多寡從王而出者未嘗復回飛止必環衛蜂王皆有隊伍行列採花時一半守房一半依次撥發花少受罰

穿簷為穴

郭璞云穿木蜂黑色似土蜂而大在人家簷椽間穿穴如刀錐所鑽能螫人

穿竹為巢

郭璞云有一種黑蜂穿竹作孔者名笛師俗呼鑽竹蜂蜂如小指有黃甲甲下有翅穴竹為巢不螫人不穿木  
有蜜如稠糖又有牛舌玄釵赤翅等名

蝶

古今注蛺蝶一名野蛾一名風蝶江東謂之捷末色  
白背青者是也又有大如蝙蝠者或黑色或青斑名  
曰鳳子一名鳳車一名鬼車生江南橘樹間

莊周夢

見夢感

韓憑魂

俗傳大蝶必成雙乃梁山伯祝英臺之魂又曰韓憑夫  
婦之魂皆不可曉李義山詩青陵臺畔日光斜萬古貞

菟倚暮霞莫許韓憑為蛺蝶等閒飛上別枝花

周昉圖

藝文志周昉有畫撲蝶圖一卷

滕王寫

唐滕王湛然善寫蝴蝶羅隱詩滕王刀筆精寫爾逼天生舞巧何妨急飛高所恨輕野田黃雀慮山館主人情此物那堪作莊周夢不成

橘蠹化

陸龜蒙蠹化篇橘之蠹化為蝶

疏葉為

埤雅列子謂烏足之根為蟬螬貝葉為蝴蝶予嘗見園  
蔬為蝶者三分二已蝶矣其一尚葉也干寶云稻成蠶  
麥成蛺蝶豈虛語哉唐段成式曰白蛺蝶尺蠖蠶所化  
也秀才顧非熊少時嘗見鬱棲中壤綠裙幅旋化為蝶  
工部員外郎張周封言將百合花合之泥其隙經宿化  
為大蝴蝶

# 粉翅

埤雅蛺蝶粉翅有鬚一說蜂蝶醜皆以鬚嗅鬚蓋其鼻也杜詩花蕊上蜂鬚比今絡緯蠅蟻之類亦以其鬚當鼻耳雜俎李衛公得峽中蛺蝶翅闊四寸深褐色每翅上有三箇金眼謂之鬼蝶清異錄溫庭筠嘗得一句云蜜官金翼使遍告知識無人可屬久之自聯其下曰花賊玉腰奴上指蜂下指蝶也玉腰亦可對粉翅

## 香鬚

晏元獻詩香鬢粉翅暖爭飛品物多情總屬伊上國萬  
家風月夜樓臺取意宿花枝

宿花爭絮

林和靖詩細睂雙顰敵秋毫萋萋芳園日幾遭清宿露  
花應自得煖爭風絮欲相高情人逝久魂猶在傲吏齊  
來夢亦勞閒掩遺編若堪恨不并香草入離騷

傅粉塗金

李商隱詩重傅秦臺粉輕塗漢殿金又曰西子尋遺殿

昭君覓故村

依槩

杜詩風蝶勤依槩

過牆

宋景文詩撲粉曾過宋玉牆  
一身生計託羣芳不須長  
結東風願秋菊春蘭各有香

蟬

格物論蟬兩翼喙長在腹下或以為無口以膀鳴禮

月令仲夏之月蟬始鳴陶隱居曰五月不鳴蟬小兒  
多天死故蟬蛻治小兒驚癇等症方言齊謂之蟬蛻  
楚謂之蟬蛻或謂之蛉蛻自關以東謂之虻蛻或謂  
之蜚蛻或謂之蜚蛻楚謂之蛻宋衛之間謂之蟬蛻  
陳鄭之間謂之蛻秦晉之間謂之蟬蛻海岱之間謂  
之蛻其小者謂之蛻或謂之蛻馬或謂之麥蛻或謂  
之馬蛻一名絡緯一名縹絲娘有文者謂之蜻蛚其  
雌謂之足大而黑者謂之蛻黑而赤者謂之蛻蛻蛻

謂之茅蜩螻謂之寒蜩莊子曰朝菌不知晦朔螻蛄  
不知春秋埤雅螻蛄夏蟬也是故不知春秋離騷螻  
蛄鳴兮啾啾歲暮兮不自聊則螻蛄亦秋蟬矣一曰  
春生者死于夏夏生者死于秋故曰不知春秋蜀中  
又有一種其脫殼頭上有一角如花冠狀名蟬花乃  
是蟬在殼中不得出而化為花自頂中出也大抵蟬  
皆垂昏夜方出土中升高處一因畏人二因畏日炙  
乾其殼而不能脫也至寒時又復墜地

無力不食

孝經援神契蟬無力故不食

無口而鳴

埤雅兔絲無根而生蛇無足而行魚無耳而聽蟬無口而鳴又蟬飲而不食蠶食而不飲不食故蟬無尿而有尿不飲故蠶無尿而有尿蟬三十日而化蠶二十日而化草木子曰蛩屬卻行蜻屬紆行蜎屬膀鳴發皇翼鳴蚣蟥股鳴榮原胃鳴蜥蜴骨鳴

## 五德

陸雲寒蟬賦序頭上有綏則其文也含氣飲露則其清也黍稷不享則其廉也處不巢居則其儉也應候守節則其信也

## 八名

八名即爾雅所謂曰蜎曰蜎蜎曰蜎蜎曰蜎蜎曰蜎蜎曰蜎蜎曰蜎蜎曰蜎蜎八種是也李巡注以下皆分別五方之語而名不同也

飲露

徐廣車服雜志侍臣加貂蟬者取其清高飲露而不食也又曹大家蟬賦吸清露于丹園抗喬枝而理翮

吟風

芻蕘論秋風至而寒蟬吟蔡邕月令鳴則天涼故謂之寒蟬傅玄賦聆商風而和鳴鹽鐵論以所不覩而不信若蟬不知雪也

歸火

呂氏春秋耀蟬者務明其火振其樹若火不明雖振樹  
無益人有明德則天下歸之若蟬之歸明火也

含和

曹植蟬賦內含和而弗食兮與衆物而無求棲喬枝而  
仰首兮漱朝露之清流

笑鵬

見鵬

避雀

齊褚玠風裏蟬賦或孤吟而不斷或亂響而還連垂玄綏而嘶定避黃雀而聲遷

侍中貂

見侍中

中書冠

梁朱异為通事舍人後除中書郎秋日始拜有飛蟬集异冠上時咸謂蟬珥之兆

嚙庭

古今注牛享問董仲舒曰蟬為齊女何也答曰昔齊王  
之后怨王而死化而為蟬登庭樹嘒嘒而鳴王悔之故  
名蟬為齊女

號軒

李白詩秋蟬號階軒感物憂不歇

復育化

王充論衡蟬螭化為復育復育轉為蟬生兩翼不類螭  
螭一名王蜎其生坼母背而出

蛭蛻化

雜俎蟬未蛻時名復育相傳言蛭蛻所化秀才韋翱座  
在杜曲常冬月中掘樹根見復育附于朽處怪之村人  
言蟬固朽木所化也翱因剖一視之腹中猶有爛木舊  
說朽木化為蟬壞裙化為蝶腐菌化為蜂

舍卑穢

埤雅蟬舍卑穢趨高潔其禪足道也抱朴子曰玄蟬之  
潔饑不羨蛭蛻之穢飽故顏回之簞瓢有以輕倚頓之

富也

慕清虛

歐陽脩鳴蟬賦嘒嘒非管泠泠若絃裂方號而復咽淒  
欲斷而還連吐孤韻以作律含五音之自然吾不知其  
何物其名曰蟬豈非因物造形能變化者耶出自糞壤  
慕清虛者耶凌風高飛知所止者耶嘉木茂樹喜清陰  
者耶呼吸風露能尸解者耶綽約雙鬚脩嬋娟者耶

翳葉

晉傅咸黏蟬賦遂寓目于周覽見鳴蜩于纖枝翳翠葉  
于長吟信厥樂之在茲苟得意于所歡曾往黏而莫知  
匪爾之命薄坐偷安而忘危梁蕭子範有後堂聽蟬詩  
隋顏之推有聽鳴蟬篇

鳴榆

見露

螳螂

螳螂有斧蟲究人謂之拒斧其臂如斧奮之當轍不

避一名螳蟻一名不過其子蜉蝣一作蜉蝣爾雅正義深秋乳子至夏初乃生一生百子如螽斯云

莊公迴車

淮南子曰齊莊公出獵有螳螂舉足將搏其輪問其御曰此何蟲對曰此螳螂也為蟲知進而不知退不量力而輕就敵公曰此為天下勇蟲矣迴車避之勇士歸焉

莊生捐彈

莊子外篇莊周遊于雕陵之樊覩一異鵲自南方來者

感周之類而集于栗林周曰此何鳥哉翼殷不逝目大  
不覩蹇裳躩步執彈而留之覩一蟬方得美蔭而忘其  
身螳螂執翳而搏之見得而忘其形異鵲從而利之見  
利而忘其真莊周怵然曰噫物固相累二類相召也捐  
彈而反走虞人逐而誅之

執翳蔽形

埤雅螳螂好捕蟬食之執木葉以自蔽蟬將去而未飛  
為之一前一腳世云螳螂所執之翳可以蔽形

含氣生火

類從螳螂之氣含之生火蚯蚓之塵背灑起霧

蟋蟀

方言蜻蛚楚謂之蟋蟀或謂之蜚南楚間謂之蚯蛚  
埤雅蟋蟀似蝗而小善跳色正黑有光澤如漆一名  
蜚一名促織一名絡緯一名莎雞蟋蟀有三尾者雌  
也二尾者雄也吳人取其雄而趨健者馴養以鬪其  
鳴在股間非其口也傳曰蟋蟀之蟲隨陰迎陽得寒

乃鳴詩義問蟋蟀食蠅而化

入牀

詩豳風六月莎雞振羽七月在野八月在宇九月在戶  
十月蟋蟀入我牀下埤雅蟋蟀微物也猶知隨時可以  
人而不如乎

居壁

見六月

驚婦

里語促織鳴懶婦驚

動人

杜詩促織甚微細哀鳴何動人

清響悲聲

盧諶蟋蟀賦風戾戾而動柯露零零而隕樹月轉影而  
西頽漢迴波而東注厲清響于長宵激悲聲以迄曙

多言強聒

楊廷秀放促織賦是固霜淒露感而恤緯征人之裳者

歟身勤心苦而提耳女工之荒者歟晝間宵喧自基而  
徂堂者歟多言強聒而身隱聲彰者歟若悲若怨若憤  
若嘆而吟嘯秋夕之清長者歟

螢

古今注螢一名暉夜一名景天一名燐一名熠燿一  
名丹良一名丹鳥一名夜光一名宵燭鬼谷子曰螢  
名照夜爾雅一名即炤

腐草為

禮月令季夏之月溫風始至腐草為螢不言化者不復  
為腐草也方氏曰腐草幽之類也螢明之類也季夏腐  
草為螢蓋離之明極于此也或云螢生陰濕之地在大  
暑前後飛出是得大火之氣而化故如此明照也

爛竹化

格物論螢是腐草爛竹根所化

羞鳥

大戴禮丹鳥羞白鳥丹鳥者謂丹良也白鳥者謂蚊蚋

也其謂之鳥者重其養也凡有翼者為鳥羞也者進也不盡食也古今注以螢為食蚊蚋以此

卻馬

淮南萬畢術螢火卻馬注云取螢火裹以羊皮置土中馬見之鳴卻不敢行

戴火而寒

傳曰螢戴火而寒

無胃而育

崇有論烏無胃而生螢無胃而育

螢丸墮矢

神仙感應篇務成子螢火丸方云漢武威太守劉子南  
從道士尹公受其方合而佩之永平中于武威北界遇  
虜戰敗為寇所圍矢下如雨未至子南數尺矢輒墮地  
終不能中傷虜以為神乃解圍去

螢火照書

見篤學

放山

隋煬帝大業末天下盜起帝于景華宮徵求螢火數斛  
夜出遊山如放火光遍巖谷

繞井

杜詩却繞井欄添箇箇偶經花蕊弄輝輝

拂席流

韋應物詩螢光拂席流

緣帷徹

杜子美詩螢鑒綠帷徹

敢近太陽

杜詩幸因腐草出敢近太陽飛未足臨書卷時能點客衣隨風隔幔小帶雨傍林微十月清霜重飄零何處歸  
不畏明月

陳去非詩卻馬已錄仙人方映書曾登君子堂不畏明月見陋質但畏風雨難為光

雨中燃

梁元帝螢詩着人疑不熟集草訝無煙到來燈下暗翻  
在雨中燃

星中亂

張芸叟詩江邊螢火故輝輝巧解穿簾又點衣但取見  
時增惡思難窮生處太卑微月明敢向星中亂雲黑偏  
能雨裏飛今日分明知我去何年漂泊照吾歸

傅咸螢賦

晉傅咸賦不以資質之鄙薄兮欲增輝乎泰清雖無補

于日月兮期自照于陋形

賓王螢賦

唐駱賓王賦類君子之有道入暗室而不欺同至人之  
無跡懷明義以應時

蝗 附蝻斯

埤雅蝗一名蝻蝗河圖秘徵篇帝貪則政暴而吏酷  
酷則誅深必主蝗蟲

魚化

埤雅蝗即魚卵所化俗云春魚遺子如粟埋于泥中明年水及故岸則皆化而為魚如遇乾旱水縮不及故岸則其子久閣為日所暴乃生飛蝗或以為蝦子

鳥食

梁宗室脩為秦州刺史郡有蝗脩詣田所深自咎責忽有飛鳥千羣食蝗殆盡

中年不入

魯恭為中年令飛蝗不入境又宋均為九江守山陽楚

沛多蝗至九江輒四散卓茂為密令歐陽玄為蕪湖令  
蝗皆不入境

陳留高飛

王況為陳留太守蝗高飛去

捕蝗受錢

漢平帝時蝗起詔使者捕蝗人能捕蝗詣吏者以石斗  
受錢

捕蝗易粟

五代晉出帝天福間募民捕蝗易以粟

武陵入海

馬援為武陵太守郡連有蝗援賑貧羸薄稅歛蝗飛入海化為魚蝦

青州墮水

言行錄趙抃守青州時山東旱有蝗自青齊將及境偶遇大風乃退飛墮水而死

腹有梵字

酉陽雜俎蝗蟲腹有梵字

腹有王字

孔帖蝗蟲腹有王字或言魚子所化

唐主吞蝗

唐貞觀中京畿旱蝗食稼如削民皆憂之太宗親出郊  
祀蝗因檢數蝗吞之祝曰寧食我心毋害百姓是夜大  
雷蝗蟲不知所之民大喜

元帝祭蝗

大元成宗皇帝時蝗蟲食苗稼惟揚州等處為甚成宗往祭之忽有鶩鳥羣至蝗在地者啄之飛者以翼格殺之蝗盡滅

姚崇奏除

開元間山東大蝗姚崇奏曰詩云秉畀炎天此除蝗之義也乃出御史為除蝗使分道殺蝗

王旦卻賀

宋祥符中飛蝗過京城上詣玉清宮焚香祈禱禁音樂

三日翼日執政有袖死蝗以進者請示于朝率百官賀  
王旦曰蝗出為災弭災幸也又何賀焉乃止

詩寄荆公

宋王荆公罷相出鎮金陵飛蝗自北而南往江東諸郡  
百官餞荆公于城外劉貢父後至追之不及因書一絕  
以寄云青苗助役兩妨農天下嗷嗷怨相公惟有蝗蟲  
偏感德又隨台旆過江東

文移雍令

宋米元章為雍丘令蝗大起百姓憂之鄰縣尉司禁瘞  
後仍舊滋蔓責令保正併力捕除或言盡緣雍丘驅逐  
過此尉司移文載保正之語牒雍丘縣請各行打撲收  
埋本處勿以隣國為壑時元章方與客飲視牒大笑取  
筆書其後云蝗蟲本是飛空物天遣來為百姓災本縣  
若能驅得去貴司何不打回來傳者無不絕倒

夏奮

已下蝨斯

埤雅詩謂五月蝨斯動股言蝨斯股成而奮迅之也爾

雅謂螽醜奮蓋于是時股成而奮迅則方春時尚弱也  
故列子曰以臣力折春螽之股堪秋蟬之翼

冬終

埤雅此蟲至冬而終故謂之螽一種名土螽又名土蝶  
似蚱蜢而細長銳頭青翼能飛能跳飛不甚遠亦能害  
稼人執其兩股能搖動其身如女人織然故又名織絹  
娘又一種名阜螽一名螳螂一名負螽一名負盤亦能  
飛跳張衡曰草蟲鳴則負螽躍或云草蟲蚯蚓也阜螽

似蝨斯好與蚓交異類同穴人取之以為媚藥

股能作聲

蝨斯青色長角長股能以股相切作聲乃蟲之不妬忌  
者一生九十九子埤雅謂蝨一母百子蘇轍謂蝨生八  
十一子

乳必埋卵

蔡邕月令其類乳于土中深埋其卵

山堂肆考卷二百二十六

欽定四庫全書

子部

山堂肆考卷二百二十七

詳校官中書臣閔思毅

主事臣祁韻士覆勘

總校官降調編修臣倉聖脈

校對官中書臣陸湘

謄錄監生臣繆濂

欽定四庫全書

山堂肆考卷二百二十七

明 彭大翼 撰

昆蟲

蠅

雜俎其類有蒼者聲雄壯負金者聲清聒其聲在翼  
青者翼能敗物巨者頭如火赤頭者號為景跡

交足

埤雅蠅好交其前足有絞繩之象故繩之為字从蠅亦

好交其後足搖翅自扇故爾雅謂蠅醜扇也

折躬

青陽記術士相郭代公若青蠅拜賀方能及第公疑之  
及登科訖家庭有青蠅作八行立約數萬折躬者三良  
久乃去

止棘

詩小雅營營青蠅止于棘讒人罔極交亂四國

集瓜

見瓜

託驥

張敞書蒼蠅之飛不過十步託于騏驎之尾則致千里

懷蛆

蠅逐臭者懷蛆營利

糞點玉

雜俎青蠅糞尤能敗物雖玉猶不免所謂蠅糞點玉是也

背負金

埤雅青蠅首赤如火背若負金又曰青蠅善亂色蒼蠅善亂聲

以冰致

傳稱以冰致蠅蓋蠅常喜煖而惡寒故遇冰則側翅而遠引所謂夏蟲不可以語冰者也

以灰活

類從蠅生于灰蠅值水溺死以置灰中須臾即活

茅根化

大麻蠅或曰茅根所化其色正蒼

榆葉生

蒼蠅多生于榆葉間卷葉作房久則小蟲蛻為蠅

青蠅作吊

東漢虞詡放棄南方曰自恨疏節骨體不媚犯上獲罪  
當長沒海隅生無可與語死以青蠅為吊客使天下無  
一人知己者足以不恨

青蠅報赦

見赦

投筆逐蠅

見筆

塗扇撲蠅

金溪記盧記室多作脯每夏月則委人于十步之內扇上塗錫以撲蠅時人呼為記室獵蠅

食中獲

梁昭明太子食中頻獲蠅蟲之類密置枰邊恐厨人獲罪不令人見

甲中生

山峽中有一種小黃蠅生毒蛇鱗甲中出嚙人初不覺漸癢搔即為瘡

杖門者

北史庫狄伏連居室患蠅杖門者曰何故放入

刺同僚

宋熙寧初外學置官師職簡地親多與宴席有學官喜  
誅語同僚苦之咏蠅以刺曰衣服有時遭點污盃盤無  
處不追隨

觸睫

雜俎成式讀百家五卷頗為蠅所擾觸睫隱字敲不能  
去偶拂殺其一細視之翼甚似蜩冠甚似蜂

尋頭

歐陽永叔憎蒼蠅文曰尋頭撲面入袖穿裳或集眉端

或沿眼眶目欲瞑而復警臂已揮而猶攘孔子何由見  
周公于彷彿莊生安得與蝴蝶而徜徉

鑽故紙

古靈見牕上蠅詩百年鑽故紙未見出頭時

登芳筵

張詠罵青蠅文觸類苒苒朋飛薨薨竊羶而蠹芳筵預  
登當是之際無人不憎我疑姦人之魂佞人之魄湮鬱  
不散託蠅寄迹所以恣其點污所以遂其讒慝使潔者

不得自明玄者不得自默連璧失珍兼金奪色致義士之感心幾拊髀而太息又楊廷秀秋蠅詩秋蠅知我正哦詩拂拂緣眉復入髭欲打羣飛還歇去風光乞與幾多時

蜻蛉

色青而大曰蜻蜓一名諸乘一名蠅蚱一名蜻蛉又謂之螂蛉小而赤者一名赤卒一名絳縵一名赤弁丈人小而黃曰狐黎

飲露

埤雅蜻蛉飲露六足四翼其翅輕薄如蟬晝取蚊蚋食之遇將雨轉多好集水上款飛尾端亭亭午則亭名之曰亭以此字或作蜓又蜻蛉飛無所食則自食其尾食愈甘則尾愈盡而死

舞風

古詩舞風愁過雨點水喜初晴

附物散卵

本草會編蜻蛉乃水蠆所化水蠆既化蜻蛉蜻蛉相交還于水上附物散卵出復化為水蠆水蠆復化焉或曰蜻蛉貼水飛時以尾蘸水中人知其點水不知其點水者乃生子也既遺子于水中或為青鮓魚食之腹脹孕蟲噬母腹而出身似蟬而小名曰蝦蟇蟲及蛻始為蜻蛭或云稻田間青蟲所化一種最大者呼為馬大頭

瘞首變珠

見端午

雲母翅

韓偓詩碧玉眼睛雲母翅輕于粉蝶瘦于蜂坐來近拂  
波光舞又是慙慙為蓼叢

琉璃睛

元世祖時王振鵬詩露涼芳草曉風吹紗翼輕明水影  
歌莫便臨平山下去眼睛雙眩碧琉璃雲間張氏和振  
鵬詩翠華銷盡厲焱吹四翼低飛兩眼歌秋水藕花搖  
落久也愁點碎碧琉璃

蜘蛛附蜈蚣

格物論蜘蛛大腹深灰色多于空中作圓網在地布  
網名土蜘蛛絡幕草上者名草蜘蛛長踦者名蠚蛸  
小而長腳者名蟠子又有赤斑者有五色者有大身  
上有刺毛者有薄小者惟在屋四面布網方言自關  
而西謂之鼃螫自關而東謂之鼃鼃北燕朝鮮洌水  
間謂之蟪螽齊人呼為杜公陶隱居曰一種赤斑者  
生林落間名花蜘蛛一名絡新婦蜈蚣一名螂蛆性

能制蛇卒見大蛇便緣而啖其腦莊子所謂螂蛆甘帶是也帶小蛇也

捕蠅

廣志蜘蛛有在器下者有以絲在籬落間緣壁捕蠅者  
執多

符子曰晉重耳奔齊與五臣遊大澤之中蜘蛛布網曳繩執多而食之重耳顧咎犯曰此蟲也智之薄者矣猶役其智布其網曳其繩執多而食之況乎人之有智而

不能廓垂天之網布絡地之繩以供方寸之御是曾不  
如蜘蛛之智可謂之人乎按爾雅有足謂之蟲無足謂  
之豸

着衣

詩疏長跼蜘蛛河內人謂之嬉母着人衣當有親家至

集冕

李德裕喜徵論凡人將有喜兆蜘蛛必垂于冠冕

設機害物

勝非錄王守一自稱終南山人賣藥洛陽市嘗攜一拄杖見蛛網必以杖毀裂盡淨而後已或問之答曰天地間飛走之屬捕逐搏擊固非一物均為口腹以養性命獨蜘蛛結網張羅設機巧以害物命吾是以惡之又埤雅蜘蛛布網如冒其絲右繞今磨旋蔓生皆循右而轉亦自然之理也字說又云設一面之網物觸而後食之蜘蛛義者也

啗芋磨瘡

筆談處士劉易隱王屋山嘗于齋中見一大蜂冒于蛛網蛛搏之反為蜂所螫墜于地俄頃蛛腹欲裂徐行入草嚙芋梗微破以瘡就嚙處磨之良久腹漸消輕躁如故自後人有為蜂螫者按芋梗傅之即愈

占喜

西京雜記樊噲問陸賈自古帝王人君皆云受命于天皆有瑞應豈然乎賈曰目睨得酒食燈花得錢財乾鵲噪而行人至蜘蛛集而百事喜小故猶徵大亦宜然况

天下大寶非天命何以得之

專孽

唐蘇拯蜘蛛諭春蠶吐出絲濟世功不絕蜘蛛吐出絲  
飛蟲成聚血蠶絲何專利爾絲何專孽映日張網羅遮  
天亦何別倘居要地門害物何堪說

龔舍興嘆

見隱士

嗣宗寓譏

復齋謾錄翟嗣宗尉臨淮頗為監司所窘遂于臨淮館  
驛題蜘蛛詩纖絲來往疾如梭長愛騰空作網羅害物  
身心雖甚小漫天網紀亦無多林間宿鳥應嫌汝簾下  
飛蟲亦懼他莫學螳螂捕蟬勇須知黃雀奈君何

以氣禁蛇

已下蜈蚣

三教珠英蜈蚣見蛇能以氣禁之蓋土勝水故螂蛆搏  
蛇

以氣吸兔

雜俎綏安縣多蜈蚣大者能以氣吸兔小者吸蜥蜴相  
去三四尺骨肉自消

蛙  
附蝦蟆蟾蜍

蛙一作鼃蝦蟆之屬也一名蛤魚一名螻蛄一名長  
股一名田雞一名水雞一名黽一名土鴨青者名青  
蛙似蝦蟆而小背有黃路者名金線蛙又有蒼色者  
有斑色者有黑色者名蛤子即南風蛤也寇宗奭曰  
蛙色青腹細背尖後腳長故善跳大其聲則曰蛙小

其聲則曰蛤月令所謂雀入大水為蛤是也蚪蚪蝦蟆子也一名活即師一名活東形圓有尾雷震則尾脫而腳生又按本草圖經及爾雅埤雅諸書多分蝦蟆蟾蜍為二種或曰其實一物以其老幼殊質春夏異時遂分為二也

掌去鼃

周禮秋官蝻氏掌去鼃黽焚牡蘗以灰灑之則死以其烟被之則凡水蟲無聲

式怒蛙

韓非子曰楚王屢伐吳欲人之輕死也出見怒蛙乃為之式從者曰奚敬于此曰為其有氣故也

沉竈產蛙

通鑑趙襄子以尹鐸為晉陽後晉師圍而灌之沉竈產蛙民無叛意

拾塼投蛙

燕太子丹自喜得荆軻永無秦憂日與軻之東宮臨池

軻拾塼投蛙太子令人奉金丸進之

井底蛙

公孫述稱帝于蜀隗囂使馬援往觀之後辭歸謂囂曰  
子陽井底蛙耳妄自尊大

釜中蛙

范丹家貧釜中生蛙

當鼓吹聲

齊孔稚珪字德璋為都官尚書不樂門庭之內草萊不剪

中有蛙鳴或曰欲為陳蕃乎稚珪曰我以此當兩部鼓吹  
何必效陳蕃王宴鳴鼓候之聞羣蛙鳴曰此殊聒人耳  
答曰我聽鼓吹不及此宋子京詩越國車前矜勇甚子  
陽井底太驕生乘時不羨雲門樂口作儀同鼓吹聲註  
云齊張狗兒將拜儀同日口自作鼓吹聲

廢絲竹聽

梁沈僧照別名法朗少事天師道士後為山陰令時武  
陵王紀為會稽宴集池亭蛙鳴聒耳王曰殊廢絲竹之

聽僧照呪厭之便息日晚王欲其復鳴僧照曰王歡已  
闌令汝恣鳴即喧聒

接腋持頤

莊子曰公孫龍問魏公子牟曰龍學先生之道自以為  
至達今聞莊子之言茫然異之敢問其方公子牟仰天  
而笑曰子獨不聞埳井之蛙乎謂東海之鼃曰吾樂歟  
吾跳梁乎井幹之上入休乎缺甃之崖赴水則接腋持  
頤蹶泥則沒足滅跗凡虬螭與蚪蚪莫吾能若也且夫

擅一壑之水而夸時埴井之樂此亦至矣夫子奚不時  
來入觀乎東海之鼃左足未入而右膝已紮矣于是遂  
巡而卻告之海云云于是埴蛙聞之適適然驚規規然  
自失也今子不知是非之境而猶欲觀于莊子之言是  
猶使螭負山商距馳河也必不勝任矣

弩眼脹腹

艾子使燕燕王曰吾小國也日為強秦所侵如之何則  
可艾子曰亦有分也王曰其有說乎艾子曰昔龍王逢

一蛙于海濱蛙問曰王之居處如何王曰珠宮貝闕輦  
飛璇題王復問汝之居處何若蛙曰綠苔碧草清泉白  
石復問曰王之喜怒如何王曰喜則時降膏澤使五穀  
豐稔怒則先之以暴風繼之以飛電使千里之內寸草  
不留王問蛙曰汝之喜怒如何曰吾喜則清風明月一  
部鼓吹怒則先之以弩眼次之以脹腹然至脹過而休  
于是燕王有慙色

卜水旱

章孝標詩田家推五行水旱卜蛙聲

問公私

朱元晦聞蛙詩兩蛙盛怒鬪春池羣吠同聲徹曉帷等  
是一場狼籍去更無人與問公私

張文潛鳴蛙賦

夏雨初止積潦過尺有蛙百千更跳互出幸此新霽夜  
月清溢我勞其休歸偃于室于時蛙鳴若啼若訴若歌  
若歡若悲若喜若怒而詬若噦而謳若咽而嗽瘖者之

呼吃者之鬪或急或緩或清或濁若羌絲野鼓雜亂無節蠻歌獠語詭怪迭作又似夫困于泥濘失其處所而悲早暵既久得其所處而樂也

陳君舉怒蛙說

日有烏月有蛙蛙與烏相遇烏戲蛙曰若齧肉耳躍之高不咫尺焉能為哉蛙曰吾已矣若無斬我烏曰若亦能怒耶蛙曰吾翹吾足翳太陰之光呀吾頤啗其壤矐吾目列星不敢輝奚而不能怒若不吾信月于望吾怒

以示若其望月果無光他日蛙過烏曰曩吾怒得無惕乎烏曰若焉能惕我哉吾振羽翳太陽之光肆吾味啄其壤徐以三足蹴之天下不敢寧而居吾視若之怒眇矣奚以若惕為若不吾信月于朔吾怒以示若其朔日果無光嗇人伐鼓馳且走焉

化鵲

已下蝦蟆

淮南子曰老蝦蟆化為鵲

制蚤

陸氏曰燒蝦蟆可以制蚤蟲

接蟲

埤雅蝦蟆背有黑點身小能跳接百蟲善鳴與蟾蜍不類

食蛇

格物論蝦蟆者一名田父能食蛇蛇行田父逐之蛇不得去田父銜其尾久之蛇死尾後數寸皮不損而肉已盡矣世傳蛇噉蛙今田父食蛇其說頗怪當是別有一

種耳

性懷土

埤雅俗說蝦蟆性懷土雖取以置遠郊一夕復還其所  
洪駒父詩蝦蟆何為者瘕磊盎于背人言懷土蟲棄去  
俄復在

舞應節

神僊傳指蝦蟆使舞皆應絃節

無腸

雜俎蝦蟆無腸又曰鶴影抱蝦蟆聲抱今里俗聞其春  
鳴謂之聒子聒子即所謂聲抱也又曰蝦蟆生子後腹  
空無物故曰無腸本草會編蝦蟆曳腸于水際草上纏  
激如索日見黑點漸深至春水時鳴以聒子

無血

洪駒父詩動物類含血蝦蟆獨無之雙目但瞠也一腹  
亦瞠其蘇東坡詩悍目知誰瞋瞠腹空自脹慎勿困蜈  
蚣饑蛇不汝放又世言蝦蟆蜈蚣蛇三物相值皆不動

彼此畏食也

秋鬪

漢武帝元鼎五年秋蛙與蝦蟆鬪是歲四月將軍衆十萬征南越開九郡

夜哭

父子浮于海夜泊島嶼中聞水下有人哭聲復若人言遂聽之其言曰昨日龍王有令水族有尾者斬吾鼉也故懼誅而哭汝蝦蟆無尾何哭復聞有言曰吾今幸無

尾便恐更理會科斗時事也齊卞彬蝦蟆賦曰紆青拖紫名為蛤魚世謂比令僕也

錦襖子

尚書故實百越人以蝦蟆為上味皮最佳故越人云不可脫去此乃錦襖子

綠衣人

某朝皇帝尚食將供蝦蟆充御膳上忽夢綠衣人數百乞貸命後方悟其為蝦蟆因禁採捕或云蝦蟆能食蝗

故禁採捕事文類聚云此事不記何書

### 華林園

晉惠帝在華林園聞蝦蟆聲問左右曰此鳴者為官乎  
為私乎侍中賈屑對曰在官地為官在私地為私

### 益州山

神僊傳益州北平山有蝦蟆謂之肉芝王喬食之成僊  
飛天

白居易蝦蟆詩常恐飛上天跳躍隨姮娥往往蝕明月

遣君無奈何

蝕月

盧仝月蝕詩又聞古老說蝕月蝦蟆精

股長

韓昌黎答柳柳州食蝦蟆詩蝦蟆水中居水特變形貌  
強號為蛙蛤于實無所按雖然兩股長其奈背脊跳  
躑雖云高意不離潭淖鳴聲相呼和無理祇取鬧周公  
所不堪灑灰垂典教或曰此詩乃蛙非蝦蟆也

形穢

白居易蝦蟆詩形穢肌肉腥出沒于泥沙

合玉

已下蟾蜍

埤雅蟾蜍吐生腹大背黑皮上多癍磊跳行舒遲其肪  
塗玉則軟刻削如蠟本草所謂能合玉石者也抱朴子  
曰蟾蜍壽至千歲者頭上有角頷下有丹書八字變化  
自然論蟾蜍擲糞自其口出又長秋山洞中有千歲蟾  
蜍見者得道白日上升

辟兵

見端午

蚯蚓 附尺蠖

蚯蚓一名螻蚓一名蜿蟺一名土龍一名地龍一名  
螳蟬一名胸臆一名寒蟪能應時而鳴江東呼為歌  
女又曰鳴砌有一種白頸者其老且大者也尺蠖亦  
屈伸蟲也一名螂蠨又名步屈

孟夏出

禮月令孟夏之月螻蛄鳴蚯蚓出螻蛄不鳴水潦淫漫  
蚯蚓不出嬖奪后

仲冬結

月令仲冬之月荔挺出蚯蚓結蚯蚓不結君政不行注  
云結屈也埤雅蚯蚓穴居首陽下向陽動則穴而上首  
故其身結而屈也

大如虹

世紀黃帝時大虹大螭如虹呂氏春秋黃帝時見大螭

知土氣勝故其色尚黃

森如箭

五行記陳後主時隋軍至江蚯蚓盡出森如植箭蓋陳氏水鄉也蚯蚓土蟲象也又陳氏自稱土德盡出者明傾其窟穴以曲歸直也是歲隋平陳

飲泉

孟子夫蚓上食槁壤下飲黃泉

食土

本草注其屎呼為蚓塿食細土無砂石

卻行

考工記注蚯蚓卻行埤雅蟬土精也其為物不息引而後伸猿善緣蚓善引蛤介合蟬介解

長吟

埤雅蚓字一作蟬蓋蚓達于寅故从寅善長吟于地下  
阜蝨同穴

本草會編夏月夜鳴于草底與阜蝨同穴為雌雄五月

五日收取堪為媚藥詩嚶嚶草蟲趯趯阜螽注云草蟲  
蝗屬張衡曰曲蟺鳴則阜螽跳是又以蚓為草蟲也

螻蛄助聲

梅都官詩蚯蚓在泥穴出縮常自盈龍蟠亦以蟠龍鳴  
亦以鳴自謂與龍比恨不頭角生螻蛄似相助草根無  
停聲聒亂我不寐每夕但欲明天地且容蓄憎惡惟人  
情

無心

舊說蚯蚓土精無心之蟲與阜蟲交

乏骨

東方虬蚯蚓賦雨欲垂而乃見暑既至而先鳴乍逶迤而鱗屈或宛轉而蛇行內乏筋骨外無手足任性行止物擊便曲徒進退而皓首竟不知其所欲又傳曰魚無耳蟬無口蛇無足蚯蚓無筋

簡易

歐陽公雜記蚯蚓食土而飲泉其為生也簡而易足然仰

其穴而鳴若號若嘯若歌其亦有所求耶抑其求易足而自鳴其樂耶其生之陋而自悲其不幸耶將自喜其聲而鳴其類耶豈其時至氣作不自知其所以然而不能自止耶

清廉

王荊公詩藁壤太牢俱有味可能蚯蚓獨清廉

屈以求伸

已下尺蠖

易曰尺蠖之屈以求伸也漢志尺者隻也蠖之義蓋取

諸尺蠖之義蓋取諸引引者伸也萋于尺伸于引今人布指求尺一縮一伸如蠖之步故謂之尺蠖

動而成響

屋賦蠅螟飛而生風尺蠖動而成響埤雅此言屋之空曠深靜易以生風答響如此

吐絲如蠶

亢桑子曰夫俗隨國政之方圓猶尺蠖之於葉也食黃則身黃食蒼則身蒼尺蠖似蠶食葉老亦吐絲作室

化繭為蝶

舊說尺蠖之繭化而為蝶此猶蛹之變蛾爾

山堂肆考卷二百二十七

欽定四庫全書

山堂肆考卷二百二十八

明 彭大翼 撰

昆蟲

蚊

說文齧人飛蟲以昏時出也秦晉謂之蝮楚謂之蚊  
埤雅蝮喜亂飛似蚊而小望之如霧因雨而生與蚊  
實異古今注呼蚊蝮為秦民東坡志林湖中多蚊其  
中有豹腳者尤毒詩云風定軒牕飛豹腳雨餘欄檻

上蝸牛

負山

莊子曰使蚊負山商距馳河言勢不能也

成市

埤雅蚊有昏市蓋蠅成市于朝蚊成市于暮

丹鳥羞

見螢一名白鳥

焦螟巢

列子曰海上有蟲巢蚊睫名曰焦螟

瞖膚

莊子曰蚊蚋瞖膚則通宵不寐

撲面

張文潛秋蚊詩江城落木已窮秋病客初寒欲襲裘暗  
室飛蚊猶撲面不知天上火西流

性惡煙

埤雅蚊性惡煙以艾熏之則潰

聲如雷

漢中山靖王來朝天子置酒聞樂而泣問其故對曰臣聞衆煦漂山聚蚊成雷是以文王拘于羑里孔子厄于陳蔡又梁湘東王蕭繹作金樓子云荊州高齋盛夏之月無白鳥余寢處于中及移餘齋則聚蚊之聲如雷矣數丈之間如此之異可怪哉

開幃進蚊

金樓子齊桓公卧于栢寢謂仲父曰吾國富民殷無餘

憂矣一物失所寡人悵悵今白鳥營營是必饑耳因開  
翠幃進之其蚊有知禮者不食公之肉而退有知足者  
集公之肉而退有不知足者遂長嘯短吸而食之及其  
飽也腹腸為之潰破

覆射知蚊

漢郭舍人曰顧問方朔一事朔得臣願榜百朔窮臣當  
賜帛曰客從東方歌謳且行不從門入踰我垣墻遊戲  
中庭上入殿堂擊之桓桓以者攘攘格鬪而死主人被

創是何物也朔曰長喙細身晝已夜存嗜肉惡烟為掌  
所捫臣朔愚戇名之曰蚊舍人辭窮當復脫禪

趙炳善禁

東漢趙炳有道術能禁蚊章安令惡其惑衆收殺之人  
為立祠于永康至今蚊蚋不能入

吳猛不驅

吳猛少有孝行夏月多蚊而不搖扇恐蚊去已而噬親  
也

利嘴微形

吳融平望蚊子詩平望有蚊子白晝來相屠不避風與  
雨羣飛出菰蒲擾擾蔽天黑蓄然隨舶艫利嘴入人肉  
微形紅且濡振蓬亦不懼至死貪膏腴舟人敢停棹陸  
者亦疾趨南北百餘里畏之如虎驅

叢身聒耳

歐陽公憎蚊詩翩翩伺昏黑稍稍出壁屋填牕來若翳  
聚隙多可掬叢身疑陷圍聒耳如遭哭猛攘欲張拳暗

中甚飛鏃手足不自救其能營背腹

貪婪

韋楚老江上蚊子詩搖狹翅亞紅腹江邊夜起如雷哭  
請問貪婪一點心腐肉填胸幾多足越女如花住江曲  
寒蛾夜夜凝雙綠任君撩亂錦牕中十幅輕綃圍夜玉  
嚶喝

歐陽公曰予昨作憎蠅賦蠅可憎矣尤不堪蚊子自遠  
嚶喝來咬人也

蟻

格物論蟻穴居卵生有白黑黃赤大小數種蟻一作  
螳大螳俗呼為蚍蜉又曰馬蟻小曰蟻蚋又有翅飛者  
其子曰蚍蚍螳卵也揚雄方言齊魯之間謂蟻曰蚍  
梁益之間曰玄蚍燕齊之間曰蟻蚋

慕羶

莊子曰羊肉不慕蟻蟻慕羊肉羶也

趨穢

格物論蜂以潮候而排衙蟻以雨至而酣戰附羶趨穢頃刻羣集

盤馬

傳曰蟻封盤馬

觀鼃

符子曰東海有鼃焉冠蓬萊而浮游于滄海有蚺蟻聞而悅之與羣蟻至海畔欲觀焉月餘鼃潛未出羣蟻將返遇長風激浪崇濤萬仞羣蟻曰此將鼃之作也數日

海中隱如嶽峙蟻曰彼之冠山何異我之戴粒逍遙封壤之巔伏乎窟穴之下也

徒蠅

雜俎成式兒戲時嘗以棘刺標蠅置蟻來路此蟻觸之而返或去穴一尺或數寸纔入穴中者如索而出疑有聲相召也其行每六七有大首者間之整若隊伍至徒蠅時大首者或翼或殿如備異蟻狀也

致蠅

雜俎元和中假居在長興里庭有一蟻穴蟻色正黑腰節微赤首銳足高走最輕迅每生致蟻及小蟲入穴輒壞垤穴蓋防其逸也

制鯨

韓詩外傳吞舟之鯨蕩而失水則為螻蟻所制

燒馬

古今注牛亨問董仲舒曰玄駒何也答曰河內人見有人馬數十萬騎皆大如黍粟旋動往來從朝至暮家人

以火燒之人皆成蚊蚋馬皆成大蟻故今人呼蚊蚋曰  
黍民蟻曰玄駒

時行

莊子曰得時則蟻行失時則鵲起蓋蟻行逶遲有序需  
而不速

酣戰

埤雅蟻善鬪力舉等身鐵鬪輒酣戰不解有行列隊伍  
又云蟻有君臣之義抱朴子曰蟻有兼弱之智

攻藥

元稹文集巴蟻衆而善攻藥棟往往木形完具而心節朽壞屋居者不省其微而禍成傾壓

封戶

易林蟻封穴戶大雨將集埤雅蟻將雨則出而壅土成峰鸛鳥見之長鳴而喜

潰堤

韓子曰千丈之堤以蟻穴而潰鮑明遠詩蟻壤漏成河

穴獄

東陽元凝齊諧記董昭之過江見蟻冒一短蘆昭之救  
之後繫獄領羣蟻穴獄昭之得免

處宮

化書螻蟻之有君也一拳之宮與衆處之一粒之粟與  
衆蓄之一罪無疑與衆戮之

登竈

異苑桓謙字敬祖太元中忽有人皆長寸餘悉被鎧持

槃緣机登竈尋飲食之所或有竊肉以槃刺取徑入穴  
蔣山道士朱應子以沸湯澆所入處寂不復出因掘之  
有斛許大蟻盡死穴中譙後以門釁遂滅

動于牀下

世說殷仲堪父師為晉陵太守嘗病虛悸聞牀下蟻動  
云是牛鬪

漁于硯中

纂異記徐玄之夜讀書忽見武士數百升于牀縱獵于

花毯之上又見數百人升案攜網罟之具漁于硯中得魚數百至明日掘得蟻穴盡焚之

當門積土

京房易占蟻無故當道若門戶城郭積土水且傷人

驗壤得泉

韓子曰齊桓伐孤竹行山中無水隰朋曰蟻冬居山之陽夏居山之陰蟻壤寸而有水乃掘之遂得水李德裕蚍蜉賦嘗濟齊師之乏亦聞媯德之羶覩封穴而知雨

驗寸壤而得泉戴粒而遊若巨鼃之冠神嶽繞磨而行  
若日月之麗青天

鹽而恐傷

宋哲宗在宮鹽而避蟻程頤講書畢請曰有是乎上曰  
然誠恐傷之耳頤曰推此心以及四海帝王之要道也  
上曰善

見而不踐

宋徐孝節先生自小戒殺見聚蟻惕然惟恐踐之又宋

郊渡蟻見狀元

蝨

說文蝨齧人蟲也蟣蝨子也抱朴子曰頭蝨著身皆  
稍變而白身蝨處頭皆漸化而黑或云蝨最忌水銀  
銀硃以二物熏之絕跡

甲冑生蝨

韓子曰甲冑生蟣蝨

湯沐弔蝨

淮南子曰湯沐具而蟣蝨相弔

懸牖

見射

投牀

鄭縻傳信記無畏三藏飲酒食肉言行簾易律師不悅  
常令宿于戶外律師中夜捫蝨投牀下無畏即呼曰撲  
殺佛子律師異之

有蝨皆剃

東漢記馬援擊潯陽山賊上書曰除其竹木譬如嬰兒  
頭多蟣蝨而剃之蕩蕩然則蟣蝨無所復依書奏上大  
悅因出小黃門有蝨者皆剃之

多蝨恐饑

齊江泌性仁慈衣弊蝨多以綿裹置壁上恐蝨饑死乃  
復置衣中自後終身無蝨

搔蝨不堪

晉嵇康與山濤書危坐一時痺不得揺體復多蝨爬搔

無已而況衆以章服揖拜上官三不堪也

擇蝨不動

語林晉王導辟顧和為揚州從事月旦和當朝未入停車門外周顗遇之和方擇蝨夷然不動顗指和心曰此中何所有和徐應曰此中最是難測地

見主捫蝨

王猛隱華山懷佐世之志聞桓溫入關被緼袍而詣之面談當世之事捫蝨而言旁若無人溫異之

對客覓蟲

非齊邢子才位中書監脫略不修威儀有齋不居坐卧  
常在一小屋果餌之屬置之梁上賓至下而共噉對客  
或解衣覓蟲且與劇談

蓬纓採蟲

齊卞彬蟲賦序士蔚居貧多病縈寢敗絮澡刷不謹澣  
沐不時四體氄氄加以臭穢故葦席蓬纓之間探採蚤  
蝨日不替手按士蔚彬之字也

衲衣養蟲

國老閒談查道性淳古少寓狼山寺躬事薪水以給僧  
衆衲衣不洗濯以養蟲後仕至龍圖閣待制

承首擇蟲

北史馬子如為大行臺及文襄輔政子如見之文襄哀  
其憔悴以股承其首親為擇蟲賜酒百瓶羊五百口粳  
米五百石子如曰無事向被囚幾死若受此豈有生路  
耶

見形呼蟲

宋道君北狩至五國城衣上見蟲呼為琵琶蟲以其形類琵琶也

逃深匿壤

阮籍大人先生傳世之所謂君子惟法是脩惟禮是克行欲為目前檢言欲為無窮則少稱鄉黨長聞隣國上欲圖三公下不失九州牧獨不見羣蟲之處禪中逃乎深縫匿乎壤絮自以為安吉宅也行不敢離縫際動不

敢出禪襠自以得繩墨也然炎丘火流焦城熾都羣蟲  
處于禪中而不能出也君子之處域內何異夫蟲之處  
禪中乎

回臭跖香

李商隱蟲賦亦氣而孕亦卵而成晨驚朝鶴不知其生  
汝職惟齧而不善齧回臭而多跖香而絕

食血自安

梅聖俞蟲詩貧衣弊易垢易垢少蟲難羣處裳帶中旅

升裘領端藏迹詎可索食血以自安人世猶俯仰爾生  
何足觀

懷絮非吉

前人秀叔頭蝨詩吾兒久失恃髮括仍少櫛曾誰具湯  
沐正爾多蟣蝨變黑居其元懷絮非吉宅蒸如蟻亂緣  
聚若蠶初出髮搔極蓬葆何暇食梨栗剪除誠未難所  
惡累形質又王介甫有和王樂道烘蝨詩司馬君實有  
和王介甫烘蝨詩俱見事文類聚

蚤

蚤齧人蟲也黑色善跳俗云蟲生汗垢蚤生積灰亦有雌雄雄小雌大或曰布谷鳥所吐如蚊母之吐蚊也故三月蚤多至四五月漸衰又一種身扁而臭不能跳善齧人名曰交蚤又名扁蟲京師呼為壁陀蟲殺蚤不誠

韓子曰韓昭搔而痒亡一蚤求之甚急左右因取已蚤蝨而殺之昭侯以此察左右不誠也

賦蚤有指

卞彬為南康郡丞仕既不遂及著蚤蝨蝸蟲蝦蟆等賦  
皆大有指斥

蠹

附辟錢已下諸蟲

周禮剪氏掌除蠹物以攻崇攻之以莽草薰之  
米穀蠹

爾雅姑蜚強蜚注云今米穀中蠹小黑蟲是也建平人  
呼為蜚子俗呼穀狗江東人名曰蜚

衣書蠹

爾雅蟬白魚注云衣書中蠹蟲一名蛎魚是也一說名壁魚既老則身粉手拂之即落其形稍似魚尾分兩岐  
桑蠹

爾雅蝥謁注云在水中桑蠹是也本草食木心穿如錐刀身長足短口黑無毛正白色至春羽化為天牛詩曰領如蝥謁蓋此蟲之體豐潔且白故詩以況莊姜之領

蓼蠹

蓼蠹蟲生蓼枝中黃身黑背作羊羶氣形似螟

蘆蠹

本草蘆蠹蟲治小兒飲乳吐逆狀如小蠶

橘蠹

陸魯望曰橘之蠹大如小指首負特角身臃臃然類蝟  
蟻而青翳葉仰齧與饑蠶之速不相上下人或觸之輒  
奮角而怒弗食弗動明日往視則蛻而為蝴蝶矣

桂蠹

漢書文帝賜尉佗衣物佗因使者獻桂蠹一器大業拾遺錄桂蠹紫色香辛有味食之去陰痰之疾一說桑蠹去氣桃蠹辟鬼柘蠹糞破血桐蠹亦可入藥

屋蠹

蜂蠹人家屋中蠹也似螳而大正白色蠹食梁棟如鋸開薄片層層可揭最畏土鼈及鴿鳥蓋其氣相制耳夏日南風起時則悉脫殼生翅如蟹飛出

石蠹

伊洛間水底石下有蟲如蠶亦解放絲連綴小石如蠶  
春夏羽化作小蛾水上飛名石蠹蟲一名石下新婦

作幕如錢

已下附

壁錢蟲似蜘蛛而身扁作白幕如錢著壁間俗呼為壁  
蠶其抱子隔幕而伏生子百數坼幕而出一名扁蟪一  
名壁鏡

作網為絡

蚰蟧蟲形狀似蜘蛛而小身有毛斑專在草木稠密作

網為幕絡如人掌大四面嚴密中通一孔出入身藏于  
內候蠅蚋觸網則出擒食之

憐蛇

蛇一名蛆渠一名馬蚰一名馬蜥一名蜎一名緯骨蟲  
一名百節蟲一名刀環蟲一名商距一名馬軸一名馬  
陸身如槎節節有細蹙紋蓋百足蟲也莊子曰夔憐蛇  
蛇憐蛇言夔以少而羨多蛇以有而羨無蓋蛇無足亦  
足夔一足亦足蛇百足亦足豈容歆羨于其間哉

交蚓

拾遺記石蜊形如蚱蜢而小身長兩股如蜊在草頭能飛螽之類也與蚯蚓交

磴風磨雨

爾雅蠓蠓注云小蟲似蚋喜亂飛或曰即蚋也一名蠓烟以其望之如烟故云一名脊蚋列子云蠓蠓生于朽木之上郭璞曰蠓飛磴則天風磨則天雨言蠓旋飛如磨則天將風一上一下如春則天必雨矣然郭氏圖

贊又云風春雨磴不知二說何以不同列子曰蝸因雨而生見陽而死

蠅雄蛹雌

埤雅蛹者蠶之所化蛾者蛹之所化荀子所謂蛹以為母蛾以為父是也蛹一名蠅蠶一名羅孫炎爾雅正義以為蠅即是雄蛹即是雌羅即是雄蠶即是雌蠶似黃蝶而小其眉勾曲如畫故詩以譬莊姜

負子

雜俎負子水蟲也有子多負之

縊女

爾雅蜺縊女注云小黑蟲赤頭喜自經死故曰縊女

攢水

雜俎象浦川渚間有蟲甚微細能攢水食船數十日其船遂壞

過街

埤雅土鼈一名塵一名過街言逢申日則過街殆與鵾

鷗忌庚申燕避戊己無異也本草土鼈生墻壁下土中濕處狀如鼠婦而大者寸餘形扁如鼈有鱗如甲此物能禁蠹寇宗奭曰一名曰簸箕蟲

翻蓋

蛻蟄一名顛當形似蜘蛛穴土為巢爾雅謂之王蛛蟬鬼谷子謂之蛛母窠深如蚓穴網絲其中土蓋與地平大如榆莢常仰掀其蓋伺蠅蝶過轉蓋捕之纔入穴復閉與地一色竝無絲隙可尋也秦中兒童戲曰顛當顛

當牢守門螭螭寇汝無處奔段成式謂螭螭好窺于書  
卷或在筆管中祝聲可聽

### 守宮

見端午又秦晉西夏謂之守宮或謂之蠪螭南楚謂之  
蛇醫或謂之螭螭東齊海岱之間謂之蜺蜺北燕謂之  
祝蜺三教珠英守宮鱗色如蛇而四足亦與魚合舊說  
蛇體有傷此物銜草傳之故又有蛇醫之號

### 失水則醉

泥出東海純肉無骨水中則活失水則醉如泥然故名  
曰泥杜詩先拚一飲醉如泥又名沙喫

聞味則飛

醯雞一名蠭生于醋甕間列子云醯雞于酒埤雅蠭蟲  
知聲知味者也故字从響蓋其一聞酒醋之氣味則飛  
聚之一聞人聲則飛散

溪狗

本草溪狗似蝦蟆生南方溪石間尾長三四寸

竈雞

竈蟲好穴于竈側一名竈馬一名竈雞形類促織而身軟長鬚兩股能跳食鍋中餘沫促織則有翼而黑色性剛善闘竈雞則無翼而褐色身弱而易死其聲亦曰織織

佗負蟲

似促織而白色雙鬚甚長無翼不能鳴偃背長股善跳好居下濕地雌雄未嘗相離

應聲蟲

此蟲生人腹中若有言小蟲者輒應之唯讀本草至藍則默然以藍汁飲之則吐出肉塊長二寸餘人形悉具服雷丸數粒即愈

前螫後蠱

陶隱居曰蠍有雌雄雄者螫人痛止一處雌者痛牽諸處雄用井泥傳之雌用瓦屋溝上泥傳之本草言蠍毒在尾蠍前謂之螫後謂之蠱段氏曰鼠負蟲巨者化為

蠍蠍子多負于背嘗見張希復言陳州古倉有蠍形如  
錢大螫人必死江南舊無蠍開元初嘗有一主簿以竹  
筒盛過江南至今江南有蠍俗呼為主簿蟲

### 朝生暮殞

埤雅蜉蝣似天牛而小有甲角長三四寸黃黑色甲下  
有翅能飛生覆水上尋死隨流梁宋間名曰渠略叢生  
鬱棲中朝生暮殞有蜉蝣之義故曰蜉蝣郭氏曰似蛄  
蜣身狹而長甲下翅小有文彩故毛詩蜉蝣之羽衣裳

楚楚云云

射工

蜮一名水鏡即短狐也似鼈三足一名射工一名含沙  
一名溪毒有長角橫在口前如弩檐臨其角端曲如上  
弩以氣為矢因以射人故俗呼水弩然鵞能食之故畏  
鵞所謂鵞飛則蜮沉鵞鳴則蛇結是也羅氏曰射工每  
四月一日上弩射人影至八月卸弩冬月蟄澗谷中此  
蟲所在雪不積蒸氣然也

避役

雜俎南中有蟲名避役一名十二辰蟲狀似蛇醫腳長  
色青赤肉鬣見于籬落間俗云見者多稱意事其首倏  
忽更變為十二辰狀

碎車

雜俎碎車蟲狀如唧聊蒼色好棲高樹上其聲如人吟  
嘯其大而黑者聲亦呼唧聊俗呼沒鹽蟲

抱槍

爾雅蚻蟻蚻注云甲蟲也大如虎豆綠色江東呼為蟻  
蚻抱槍蓋腹下有棘如槍也

蠅虎

一名蠅豹似蚻而無網絡身黑色背邊有雙肉爪攫  
蠅而食兩目似虎炯然有光說文謂之蠅蝗

馬蟻

本草蛭一名蛟一名至掌畏石灰生水中者名小蛭亦  
名馬蟻生石中者名石蛭生草中及泥中者名草蛭泥

蛭竝能著人及牛馬身上齧啞其血甚者入肉中產育  
為害大者長尺餘人呼為牛馬蟻人觸之縮如拳頃之  
引伸而縱如蚯蚓也此物極難死火灸後經年得水猶  
能活

### 食風

埤雅螻蛄臭蟲一名螻一名天螻孫炎正義以為螻是  
雄者喜鳴善飛雌者腹大羽小不能飛翔食風與土腰  
以前甚澁腰以後甚利類從所謂磨鍼致蛄汗羈引兔

蜃灰除蠹蛤陽去伏言物之相關感有如此者本草螻蛄夜出求食能含燈火而走俗呼為偷火蟲

拂火

埤雅飛蛾善拂燈火夜飛一名慕光似蝶而小似蠶蛾而能飛一名文蛾符子曰不安其昧而樂其明是猶文蛾去暗赴燈而死

雌雄相趣

異物志郎君子生南海有雌雄青碧色狀若杏仁欲驗

其真假先含口內令熱然後放醋中雌雄相趯逡巡便合即下其卵如粟粒狀是真者婦人臨產手執之即易生

膚革俱全

疥中有蟲使明目者以針取之其大不以半粟也而膚革俱全乃因人氣不和而化生者

首如鏟

雜俎度古如書帶色類蚓長二尺餘首如鏟背上有黑

黃欄稍觸則斷常起蚯蚓不敢動乃上蚓掩之良久  
蚓化惟腹泥如涎有毒雞食輒死

嘴如釘

雜俎溫會在江州與賓客看打魚漁子一人忽上岸狂  
走溫問之但反手指背不能語視之有物如黃葉大尺  
餘眼遍其上齧不可取溫令燒之落每一眼底有嘴如  
釘漁子出血數升而死莫有識者

石下新婦

見前石蠹

葛上亭長

斑貓生河東川谷間七八月大荳盛時此蟲多在葉上  
長五六分背上一畫黃文一畫黑文嘴尖處有一黑點  
食荳葉陶氏曰斑貓一蟲五變二三月在芫花上名芫  
青四五月在王不留行上名王不留行六七月在葛花  
上即名葛上亭長八月在荳花上即名斑貓九十月欲  
還地蟄即名地膽本草注地膽出幽州芫青出寧州亭

長出雍州斑貓所在有之其蟲豈一歲周四處乎陶氏又云亭長身黑而頭赤如人之玄衣赤幘故云亭長

山蛩

陳氏云山蛩蟲鳥斑色長二三寸生林間如百足蟲而大夏月能登木羣鳴冬月則蟄

水馬

本草水龜亦名水馬長寸許羣行水上水涸即飛去

青蛱蟲

廣雅蠪蝸青蚨也一名蠪蝸一名蜋蝸一名魚伯雜俎  
蠪蝸形如蟬其子如蝦着草葉上得其子則其母飛來  
淮南子曰以青蚨蟲母血塗八十一錢以子血塗八十  
一錢置子用母置母用子皆能自還名子母錢異物志  
此物雌雄常不相舍此又是一說

白蠟蟲

本草金螋白蠟蟲食冬青樹汁久而化為白脂粉敷樹  
枝人謂蟲尿着樹而然至秋刮取以水煮溶瀝置冷水

中則凝結成塊矣文理如石膏而瑩徹可和油作燭

青腰蟲

本草此蟲如蟻大赤色腰中青黑尾尖有短翅能飛春夏有之性太毒着皮肉腫起

紅嘴蟲

草木子曰一民家鐵鍋底下起一鐵泡搥破有一紅嘴蟲其走如飛其嘴至硬是金鐵中亦有蟲也又一蟲名伊威乃甕器底蟲形似白魚而大性最淫一名委黍一

名鼠婦一名鼠姑因濕化生詩云伊威在室即此

毛螫

螺蛄嘶蟲多在石榴樹上作房如雀子大其背毛能螫人老而吐沫自累久漸堅凝如巴豆大謂蛄嘶房俗名曰雀兒飯甕言雀所喜食也

背行

蟻蟻一名螯或謂之蟻螯生于糞土中外黃內黑大者如足大指以背行乃駛于腳今俗謂之蟻螯

好吸稻花

羅氏曰蜚蠊一名蟹能飛本生于草八九月知寒多入人家屋中逃避好以清旦入田中吸稻花日出則散去爾雅注云蟹即負盤蟲也

喜食瓜葉

見瓜

狀如羞

雜俎號郡有蟲名謝豹常在深土中類蝦蟆而圓如球

見人以前兩脚交覆首如羞狀能穴地如鼯鼠頃刻深數尺或出地聽謝豹鳥聲則腦裂而死俗因名之或曰謝豹人也抱耻死其魄為蟲潛行地中羞見人掘出之猶以足覆面作忍耻狀

性好睡

本草砂按子有毒能殺飛禽走獸生砂石中背有刺能倒行一名倒行狗子性好睡一名睡蟲生取之置枕中令夫妻相好

食膠蟲

雜俎夏月食松膠前脚傳之後脚聶之內之尻中

益符蟲

本草益符一名無舌可療閉疾

蚩

蚩有數種皆能啖牛馬血木蚩最大而綠色今呼為王  
蚩又呼為舍命王蜚蚩狀如蜜蜂又一種小蚩名鹿蚩  
大如蠅或云木蚩無子一名魂常

恙

風俗通恙毒蟲喜傷人古人草居露宿必相問勞曰無恙否

蝮虺

本草蝮虺似小蜈蚣青黑色長足能溺人影一名蝮虺或曰蝮虺長一寸身有毛長五六分脚多而甚細居屋壁間遇人影輒糞之糞着即生瘡如短狐之溺影也

蝮螭


蛞蝓俗呼涎牛又名蜒蝥身有涎好游下濕處頭有二角如蝸牛而無殼

遇舟則沉

見甲蟲鰕又按水母生海中四五月初生如帶至六月漸大如盤形似白線絮而無耳目口鼻鱗骨一段赤色破碎者謂之頭蝦藏腹下蝦動則蛇沉肉如水晶以明礬醃之吳人呼為水母鮮久則漸薄如紙俗呼為白皮紙

觸物乃縮

雜俎雷蜺大如蚓以物觸之乃蹙縮圓轉若鞠良久引  
首鞠形漸小如蚓焉齧人毒甚



山堂肆考卷二百二十八